

雙江先生困辯錄

雙江先生困辯錄卷之三

吉水念菴羅洪先批註

長水後學岳和聲校閱

辯心

○孔子曰操則存舍則亡出入無時莫知其鄉惟心之謂與

靈明不測出入之易而保守之難惟在操之有要耳程子曰惟謹獨便是守之之法又曰敬以直內操之之法也操猶操兵之操練也

亦在乎熟之而已矣出入無時莫知其鄉言其亡也

○大人者不失其赤子之心

純一未發初心也

○孩提之童無不知愛其親及其長也無不知敬其兄

不慮而不知不學而能良心也

○今人乍見孺子將入於井皆有怵惕惻隱之心非所以內交於孺子之父母也非所以要譽於

鄉黨朋友也非惡其聲而然也

無所為而為真心也學者須是識其真心

○一簞食一豆羹得之則生弗得則死噉爾而與之行道之人弗受蹴爾而與之乞人不屑也

有所不為不欲本心也本心真心良心初心均之為道心也學要識得心體則用工便有着落不然則狂狗逐塊後獬咬人毫釐千里矣世固有終身弊弊自謂求心而反害之乃可使不識一字之凡夫立造神妙者惟在乎

目新金 三六
識不識養之得不得也陽明先生云功夫即是本體本體亦是功夫此語湏玩味

○其日夜之所息平旦之氣其好惡與人相近也者幾希則其旦晝之所為有牿亡之矣牿之反覆則其夜氣不足以存夜氣不足以存則其違禽獸不遠矣

平旦之氣便是未發之中常存此虛明氣象而不牿亡於旦晝之所為便是得其所養也知夜氣而後知心之本體知本體而後知養

之之法

○養心莫善於寡欲其爲人也寡欲雖有不存焉者寡矣其爲人也多欲雖有存焉者寡矣

養心莫善於寡欲寡之又寡以至於無無則誠立明通誠立聖也明通賢也聖賢非性生養心焉致之養心之善有大焉如此此當與聖可學乎一節同看所欲不必沉溺只有所向便是欲故意必固我聲臭睹聞欲之大者誠明二字便是精一戒懼工夫寡欲之學不

善體貼將與克伐怨欲不行同病知意必固
我聲臭睹聞為欲者而後可以識寡欲之學
○仁人心也義人路也舍其路而弗由放其心而
不知求哀哉人有雞犬放則知求之有放心而
不知求學問之道無他求其放心而已矣

純一未發仁也發而中節義也發不中節便
是曠亦便是放求放之道莫切於致中故復
其心之本體則學問之能事畢矣哀哉二字
是孟子痛心處人能視其心如雞犬者亦鮮

矣。况心非雞犬比乎。

○盡其心者知其性也。知其性則知天矣。存其心養其性所以事天也。殀壽不貳修身以俟之所以立命也。

知天事天立命其義微矣。非達乎心之本體與本體之所從來者不足以語此。故性曰天性。德曰天德。理曰天理。存心養性而意念纔有所着便非事天。孟子言盡心養性皆有充拓涵養意。只一毫矜持把捉便是逆天物所

受為性天所賦為命性命之從來曰天意念終有

所着便非事天只持把便逆天此等句非實見心原不能隔口此性命關係處也

敢不共勉

○耳目之官不思而蔽於物物交物則引之而已
矣心之官則思思則得之不思則不得也此天
之所以與我者先立乎其大者則其小者弗能
奪也此為大人而已矣

不役耳目百度維貞便是先立乎其大者動
而不失其本然之則曰立思則得之得乎此

也先立乎其大者是象山平生學問得力處
嘗有譏象山之學者云除却先立乎其大者
更無伎倆象山曰誠然誠然

○益動而巽日進無疆

巽是順其本體之自然而動無妄動也無疆
是進而不已之意故曰益長裕而不設設是
造作安排設是造作安排然造作安排最難
免日用種種忽不覺是此意用事
矣

○惟學遜志務時敏厥脩乃來允懷于茲道積于

厥躬念始終典于學所德脩罔覺

助則不遜忘則不敏勿忘勿助自然上達故
德脩罔覺才覺便是計功謀利意

○點爾何如鼓瑟希鏗爾舍瑟而作對曰異乎三
子者之撰子曰何傷乎亦各言其志也曰暮春
者春服既成冠者五六人童子六七十人浴乎沂
風乎舞雩詠而歸夫子喟然嘆曰吾與點也

夫子先問求赤而後及點者非以點鼓瑟而
後之也正欲進點以造化二三子耳喟然吾

與之嘆一棒而四人疼其旨微矣若由求公
西之志乃所優為只是有所便屬睹聞即其
所居之位樂其日用之常如曾點則無此子
做作安排意推之於禮樂富彊無往而不得
其常白沙先生云舞雩三三兩兩正在勿忘
勿助之間此語當玩味

○君子深造之以道欲其自得之也自得之則居
之安居之安則資之深資之深則取之左右逢
其原故君子欲其自得之也

自得者得其本體而自慊也。居安資深左右逢原。渾是自得處。工夫不合本體。非助則忘。忘助皆非道。必有事焉而勿正。勿忘勿助。長成章而達以道之謂也。

○必有事焉而勿正。心勿忘。勿助長也。無若宋人然。宋人有閔其苗之不長而揠之者。芒芒然歸。謂其人曰。今日病矣。予助苗長矣。其子趨而往視之。苗則稿矣。天下之不助苗長者寡矣。以為無益而舍之者。不耘苗者也。助之長者。揠苗者。

也

義襲是養之不豫而思議竊取於事為之間
猶兵家掩不備而取勝於一時者之所為告
子渾是助的病宋人之喻孟子却於助處立
方今之學者其最高亦只是助下助一等則
為襲襲與助皆失其本體而反害之者也集
猶歛集也退藏於密以敦萬化之原由是感
而遂通沛然莫之能禦猶草木之有生意也
故曰生則惡可已矣襲而取之者義自外至

也。集義所生者義由中出也。自三代而下渾

是一個助的學問。故曰天下之不助苗長者

寡矣。與其得助農不若得情農。此二句是刻

情則苗不長而生意猶存。若助則機心生而

道心亡矣。告子不得於言勿求於心。恐言之

動乎心也。不得於心勿求於氣。恐心之動於

氣也。只勿求二字渾是助意。知言養氣是告

子對症的藥。蓋知言則無不得於言。養氣則

無不得於心。其所以不動者乃充養積盛集

義自然之效畧無一毫把捉的意告子亦然
有見却是從慈顏帶來他看得本體上一塵
加不得即雖仁義亦謂非性所有故不得則
勿求以求之則為本體累也註云冥然無覺
悍然不顧是嫚罵語助字發得孟子意出凡
在助上若未悅集義之功
即不得不從意用事也

○詩云鳶飛戾天魚躍于淵言其上下察也

鳶飛魚躍渾是率性全無一毫意必程子謂
活潑潑地與必有事焉而勿正心勿忘同意

(一) 自益動而巽至此是言用功的節度蓋後世學術不明不是錯認心便是錯用工故以學術誤天下後世者不少未發之中是堯舜相傳正法眼藏真正脉絡於此處體認得分曉則一棒一條痕一摑一掌血情命於性性命於天丹府一粒徧地黃金程伊川嘗愛杜元凱語云優而柔之厭而飫之如江河之浸膏澤之潤渙然水釋怡然理順道經亦云忘無所忘得無所得心如太空內外貞白皆理到

之言也

○顏氏之子其殆庶幾乎有不善未嘗不知知之未嘗復行易曰不遠復無祇悔元吉

此顏子復後事稱之以見其復也常復故能常知不善故能知之不復行才離本體便是遠復不遠云者猶云不離乎此也其曰不善恐於本體猶有未融化處而不免有矜持意知之非難不行惟難少有疑滯而融化不速便已屬行未嘗不知明鏡纖塵未嘗復行洪

爐點雪至明至健也知微知顯可與幾也何
悔之有殆庶則幾於化矣顏子之得一善與
有不善好並看善不善之間不易形容惟於
未發之中心體而力行者可以意會善不善
之間不
易形容此數句極有意
味知此而後可以言學

○顏子喟然嘆曰仰之彌高鑽之彌堅瞻之在前
忽焉在後夫子循循然善誘人博我以文約我
以禮欲罷不能既竭吾才如有所立卓爾雖欲
從之末由也已

顏子學問不落聞見多學的窠臼其初便從本體上老實鑽求而不知本體即物理也夫子恐其墮於意見之渺茫故誘之以博約之學如非禮勿視聽言動之類蓋心體事而無不在故凡本體散殊粲然有跡曰文萬理同出一原故凡本體純密秩然有理曰禮隨時隨處無往而不學而要只求復其本體曰約約而博則本體隨在有見故卓爾不復如向焉之高堅前後也博而約則不睹不聞本體

寂然無所見而從之末由亦無庸於仰鑽瞻
忽也此顏子竭才之學殆庶之造發聖人之
蘊教萬世無窮而精一之傳於是乎有屬也
雖欲從之末由也已矣是顏子悟得仰鑽瞻忽
老處到此地位功夫猶難又大段着力不得
恐未然

○顏子不遷怒不貳過其心三月不違仁其餘則
日月至焉而已矣

不遷怒者不為怒所遷常止也不貳過者不

為過所貳常一也常止常一久而不變三月
不違也故曰拳拳服膺而弗失之也渾是未
發氣象和風慶雲至今可想日月至焉者屢
失而屢復也故曰頻復之厲陽明先生云不
遷不貳湏是知他有未發之中始能

○回也其庶乎屢空以能問於不能以多問於寡
有若無實若虛犯而不校昔者吾友嘗從事於
斯矣

能不能有無多寡之類蓋自曾子言之有如

此而顏子則一無所見。顏子渾是虛體。能若不能多若寡。實若虛。犯而不校。屢空之象。由太虛而後有天之名。冲漠無朕而萬象森然。以具顏子之所以殆庶也。宋儒亦以此為屢空。却為空字犯了。

佛家字面故作去聲。然則空空如也。又將何解耶。

○賢哉回也。一簞食一瓢飲。在陋巷。人不堪其憂。回也不改其樂。賢哉回也。

富貴可愛可求也。顏子不愛不求而樂乎彼者。獨何心哉。蓋天地間有至貴至富可愛可

求者見其大而忘其小焉耳見其大則心泰
心泰則無不足無不足則富貴貧賤處之一
故能不改其樂見其大便是先立乎其大者
則其小者弗能奪也故曰登泰山而小天下
○顏淵問仁子曰克己復禮為仁一日克己復禮
天下歸仁焉為仁由己而由仁乎哉顏淵曰請
問其目子曰非禮勿視非禮勿聽非禮勿言非
禮勿動顏淵曰回雖不敏請事斯語矣

仁者人之生理也具此生理而後萬事萬物

之節皆本於此故曰禮禮者體也克去己私以復其本體本體復則三千三百仁體事而無不在也故曰天下歸仁非禮勿視聽言動博而約也視聽言動莫非吾心本體自然之用便是中節之和便是天下歸仁少有一毫意必便是非禮是惟顏子之至明至健而後能請事斯語即佛學之頓教頓悟也復禮集義好並看發而中節曰禮物各得宜曰義禮義若在外也義而外曰襲禮而外曰聲音笑

貌克已復禮精義入神方是成性存存禮義之門復集之旨微矣哉

○仲弓問仁子曰出門如見大賓使民如承大祭已所不欲勿施於人在邦無怨在家無怨仲弓曰雍雖不敏請事斯語矣

仲弓病痛在簡簡則徑情故不敬簡則厭物故不恕不敬不恕故多怨夫子因其病而藥之簡是仲弓氣質的病即已也敬恕是狂簡對症之藥顏子氣質純粹絕無形顯之病但

令克已復禮於元氣上調攝耳如樊遲之寵
鄙近利司馬牛之多言而躁問仁雖同而槩
以告顏閔者告之非惟無益於病而反因藥
發病也聖人之教猶天之生物因材而篤不
強人以難也

○子路問君子子曰脩己以敬曰如斯而已乎曰
脩己以安人曰如斯而已乎曰脩己以安百姓
脩己以安百姓堯舜其猶病諸

敬者心之生道德之聚也蓼蓼齊慄是脩己

以敬瞽瞍。允若象蒸蒸。又是脩己以安人。瞽瞍底豫而天下化。瞽瞍底豫而天下之為父子者定。是脩己以安百姓也。五十而慕兢兢業業。堯舜猶病也。故曰堯舜以上善無盡桀紂以下惡無盡。敬是性體之良能。徹上徹下之道。或謂論語多言敬而罕言靜。不知敬是靜的根。靜而不敬則有之。未有敬而不靜者也。敬而不靜是失之矜持把捉。非敬之本體。持敬有生熟之異。生則難熟。熟則易。

○故君子尊德性而道問學致廣大而盡精微極
高明而道中庸溫故而知新敦厚以崇禮

尊德性而不知道問學是無學也道問學而
能以德性為主是聖學也廣大也精微也高
明也中庸也故也新也厚也禮也德性之名
目也致也盡也極也道也溫也知也敦也崇
也問學之名目也自德性之無所不包無所
不備者而言曰廣大自德性之潛密滋貫無
微不至者而言曰精微自其不屈於物欲而

無所汙雜者而言曰高明自其不涉於詭異
而為衆人所同得者而言曰中庸自良知良
能得於有生之初者而言曰故自知能之形
著日長裕者而言曰新自生理之惻怛肫肫
其仁者而言曰厚自生理之等殺品節不著
者而言曰禮至德天德即德性也至道聖人
之道也凝道本於脩德故此節備言脩德之
事而洋洋優優峻極發育三千三百胥此焉
出故曰苟非至德至道不疑焉務脩道而不

知原於脩德者。未有不流於助。流於襲。流於伯也。故曰。知德者鮮。

○易則易知。簡則易從。易知則有親。易從則有功。有親則可久。有功則可大。可久則賢人之德。可大則賢人之業。易簡而天下之理得矣。天下之理得而成位乎其中矣。

廓然太公故。易一人之心。千萬人之心也。物來順應。故簡一人之情。千萬人之情也。蘊之為德。行行之為事業。可久可大。參天兩地而

成位乎其中矣易簡天地之德也人得之為
懿德故曰大本達道也

困辯錄

三卷

未

困辯錄卷之三終

雙江先生困辯錄卷之四

吉水念菴羅洪先批註

長水後學岳和聲校閱

辯素

○君子素其位而行不願乎其外素富貴行乎富貴素貧賤行乎貧賤素夷狄行乎夷狄素患難行乎患難君子無入而不自得焉在上位不陵下在下位不援上正已而不求於人則無怨上不怨天下不尤人故君子居易以俟命小人行

險以徼幸子曰射有似乎君子失諸正鵠反求諸其身

素者本吾性所固有而豫養於已者也位之所值雖有富貴貧賤夷狄患難之不同然不以富貴處富貴而素乎富貴不以貧賤處貧賤而素乎貧賤大行不加窮居不損而富貴貧賤夷狄患難處之一一則無入而不自得得者得其素也正己居易皆反求諸身之素不怨不尤非有所強也易曰素履之往獨行

願也故不願乎外願外便有不得怨尤之念
興而微幸之事作矣大意全在素字上素即
溫故之故豫立之豫先天之先前定之前故
養之有素者隨其所值坦然由之而無疑卒
然臨之而不驚無故加之而不懼佛書云悟
人在處一般又云隨所住處常安樂悟即素
也悟則智慧廣大不落輪迴即登彼岸佛氏
以喜怒哀懼愛惡欲富貴貧賤夷狄死生患
難為輪迴亦謂衆生亦謂煩惱普度衆生不

落輪迴斷除煩惱便是自得自得即彼岸也
佛氏所占地位儘高豈經生容易闢得但渠
所謂高者吾儒亦自有得在以下所叙困蹇
凡九卦皆言反身脩德之事所以辯素也傳
曰困之進人可以辯德可以速感素位一段
全是鄙見
不期
暗合

○困亨貞大人吉有言不信

卦以柔揜剛為困蓋坎剛為兌柔所揜九二
為二陰所揜四五為上六所揜揜有凌駕屏

伏。俾。不。通。寔。不。能。容。媚。嫉。以。惡。之。朋。黨。而。危。之。之。意。然。二。五。以。剛。居。中。為。成。卦。之。主。剛。中。天。德。也。天。德。充。溢。於。內。而。道。義。有。諸。已。故。能。不。怨。不。尤。無。入。而。不。自。得。身。可。危。而。志。不。可。奪。也。然。人。謀。之。未。盡。豈。可。一。委。之。命。與。時。哉。故。凡。義。之。所。當。為。者。為。之。而。不。失。乎。天。理。之。正。於。時。不。忤。於。已。不。失。趨。之。而。非。諂。避。之。而。非。畏。自。牖。而。非。行。險。于。巷。而。非。為。邪。斯。則。大。人。善。處。困。窮。之。道。也。若。徒。以。口。舌。爭。則。益。其。

困矣致命遂志志亦素也故曰素志遂則伸
其志也無求生以害仁有殺身以成仁此便
是遂志亦便是困而亨處大抵陰得時位陽
剛必為所困蓋坎以一陽陷於二陰之間來
之坎坎進退維谷故以陷名而為屯為蹇為
需為訟為未濟一皆取義於坎聖人憂世之
志可見矣困亨貞是身所經歷處說陰得時
位陽剛必為所困甚得古今情狀

○山上有水蹇君子以及身脩德

言天下之險阻莫山與水若也故山上有水

蹇而又蹇難也君子所以解其難者亦惟反
諸已而已矣愛人不親反其仁治人不治反
其智禮人不答反其敬反其仁則愛無不周
反其禮則敬無不至反其智則知無不明處
無不當所以化暴慢為恭遜轉橫逆為祥順
易以知險簡以知阻而天下之難解矣難莫
切於內困觀瞽瞍與象之化則解難本於脩
德可徵也

○履德之基也

履和而至

履以和行

履以和說躡於剛強之後於處憂患為尤切
故九卦先之蓋素履之往利用安身以崇德
也故曰德之基基所以立履之所以為履也
履非強世緣人情辯上下定民志天地非禮
不位萬物非禮不育故曰和而至

履德之基
以力行為

本和行
是中節

○謙德之柄也 謙尊而光 謙以制禮

裒多益寡稱物平施德言盛禮言恭有而不
居素履之往故曰德之柄柄者秉也山在地

中以卑蘊高謙之象也故卑而不可踰晦而不可掩謙以制禮尊而光也制有化裁通變之意

復德之本也 復小而辯於物 復以自知

已放之心約之而為主於內天理一念發動於潛伏隱微之地盖有他人所不及知而已獨知之美大聖神皆由此出故於德為本復以一陽動於群陰之下天地之心可見萬物之始與生皆資之一念之微炯然在中百體

從令小而辯也。本有真固之義而後履與謙

非色莊也。

小而辯物小字發得極是

○恒德之固也。

恒雜而不厭。

恒以一德。

守之不固則不免於頻復之厲。惟久於其道立不易方者。雖死生患難困窮拂鬱紛然。雜至而在我者。率其素履自得而不厭。恒剴上而柔下。雷風相與動而巽天地之常性。亦天地之大義也。故有恒而後可以言固。性曰恒。性德曰恒。德心曰恒。心行曰恒。行不恒而可。

與父處約長處樂者鮮矣恒之時義大矣哉

動以與故可
恒恒即素

○損德之脩也 損先難而後易 損以遠害

德之不脩欲與忿為之也蓋一朝之忿亡身
及親一念之欲喪心禍已故脩德者尚乎損
損之卦變自乾坤而來者損兌澤之深益艮
山之高損下卦上画之陽益上卦上画之陰
皆有損彼益此損欲以崇禮之義蓋上下者
理歆之幾也損之又損以至於無則德脩罔

覺蓋人情易發而難制者莫如忿易溺而難
勝者莫如欲慾忿如山制而伏之使不得逞
窒欲如澤遏而絕之使不得流非勇於克已
強於自勝者不能故難習之熟而久則安故
易脩有克治之義害即亡身及親喪心禍已
之謂也

○益德之裕也 益長裕而不設 益以興利
益動而巽日進無疆蓋動而順乎本體之自
然而無所作為以害之其進自不能已蓋得

其所養無物不長利之大者也。故曰：裕裕有克，養之義益之為卦。下震上巽，陽動陰伏，有人欲日消天理日長之幾。又風雷有相益之勢，如遷善則過益寡，改過則善益純，亦理勢之相資者。故曰：益長裕而不設，設是施設造作也。指巽處為順其本體之自然而無所作為以害之甚善

○困德之辯也。困窮而通，困以寡怨。

大意見前辯有自考之意，若尤未免於怨悔，則本有未固而所謂脩與裕者猶有所未至。

也

設字辯字
鮮得好字

○井德之地也

井居其所而不遷

井以辯義

物之居其所而不遷者惟山與井為然故邑
可改而井不可改而往者來者皆井其井又
以巽木入乎坎水之下而上出其水井養而
不窮也止於至善寂然不動千變萬化皆由
此出蓋居安資深取之左右逢其原也地有
貞靜之義辯有泛應曲當之意

巽德之制也

巽稱而隱

巽以行權

和順於道德而理於義曰巽巽則化裁通變
感而遂通天下之故而不見其迹巽以一陰
伏於二陽之下有深入之義又巽為風善入
物者莫若風風溲溲溶溶被物而物不自知故
曰制曰隱曰權井是天下之大本巽是天下
之達道曰基曰本曰固井之未備者曰柄曰
脩曰裕曰辯巽之未至者動心忍性增益其
所不能惟憂患為然是故君子以憂患為逆
者以生全之所由出也

○震亨震來虩虩笑言啞啞震驚百里不喪匕鬯
震以一陽動於二陰之下有雷出地奮之義
其於人也戒謹恐懼於隱微之中終日乾乾
震于其躬所以遏人欲於將萌存天理於既
滅內省不疚無惡於志維心亨也即雖變故
禍患出於不測如震雷虩虩遠邇驚懼君子
處之裕如而不失其所主之常蓋身可危而
志不可奪不失其所主便是福震為長子匕
鬯主祭者執以降神是重器危懼故得平安

生全出於憂患亦亨義也易以道義配禍福
故凡言吉凶悔吝皆主理欲存亡淑慝消長
處為言世之所云禍福亦不外是戰戰兢兢
臨深履薄曾子之震也震莫大於死生之際
起而易簣曰吾得正而斃焉而今而後吾知
免夫可謂不失其所主之常大象亦以恐懼
脩省為君子之震故卦名震者只主學問言
卦爻詞便兼禍患言

○易之為書也不可遠其為道也屢遷變動不居

周流六虛上下無恒剛柔相易不可為典要唯
變所適其出入以度內外使知懼雖無師保如
臨父母苟非其人道不虛行

屢遷者何也在天為太虛在地為至靜在人
為未發天地人之至理也故曰周流六虛然
不可以見聞思慮求故曰不可為典要唯變
所適莫不各有當然之則率性之道也順之
則吉逆之則凶使知懼也以動者尚其變以
言者尚其辭以制器者尚其象以卜筮者尚

其占神而明之存乎其人辭也占也變也象也皆變之所適性體之感也人情之所敬懼者父母之外惟師保耳不曰六位而曰六虛虛字當玩味虛是性之體爻之所以效也惟虛故能遷井居其所而能遷虛故也不食之井曰泥泥則不虛故是致虛之道戒慎不睹恐懼不聞心游太虛也

虛字發得是師保父母之臨虛之時也可

以觀性體

○故天將降大任於是人也必先苦其心志勞其

筋骨餓其體膚空乏其身行拂亂其所為所以動心忍性曾益其所不能

勞苦饑餓困窮拂亂是煅煉人的一個大鑪錘承受得這個大鑪錘煅煉過者金是真金人是真人雖僊佛亦要從此關過故天將使斯人之大有所成也必先勞苦困餓拂亂動忍以助其成而人之將有志於大成也亦必先勞苦困餓拂亂動忍以自考其成順適宴安而能有成者鮮矣若舜之為法於天下可

傳於後世者始可以言大成也程子曰困窮
拂鬱所以堅人之志熟人之仁又曰若要熟
也須從這裏過動心而至於無所動忍性而
至於不待忍始是增益其能無入而不自得
張子曰貧賤憂戚庸玉汝於成切磋磨治
王之功操心鍊性操鍊二字要體識陽明先
生云吟風弄月的受用却要擔枷抱鎖的工
夫身有之故言之親切而有味只宴安二字
斷送了古今無限豪傑

將降大任一節是身
有之故言之親切而

有味煅煉二字極生活人
未言宴安是千古斷案

○人恒過然後能改困於心衡於慮而後作徵於
色發於聲而後喻

求諸心而不得故困研諸慮而不達故衡不
安於困與衡故作作是性體之健勇不足以
起懦強不足以勝私奮不足以鼓氣皆不足
以言作也豪傑之士雖無文王猶興興即作
也故德曰作德聖曰作聖作之不已乃成君
子作之時義大矣哉而世之作者寥寥何也

豈求諸心而無不得研諸慮而無不達而顧
無待於作者耶抑嘗求心研慮亦有所謂困
衡乃狃於昏弱欲作而不能耶抑冥然悍然
不知求與研故亦不知困與衡而無所用其
作耶詩曰邈不作人是在作人者思所以作
之說作字處激烈豈亦作而言之耶

○子曰吾未見剛者或對曰申枨子曰枨也慾焉
得剛

剛天德也渾是天德流行而一毫人欲之私

著不得如顏子之不遷不貳三月不違其於剛為殆庶也故曰克己復禮乾道也顏淵死而吾未見剛之嘆作夫子之所以慟也若由之行行張之悻悻特其氣質有類於剛謂不屈於慾乎剛與慾正相反自弘毅之學不明浩然之氣未養而以悻悻之張為剛以氣焰可畏之衍儀為大丈夫又何怪哉孟子曰是妾婦之道也一語而萬鈞者也不屈於慾之謂剛不屈於慾之謂作作非剛不能剛而後

能作也堅強不屈四字恐於剛義未盡與作

為不屈於
慾甚是

○泰伯其可謂至德也已矣三以天下讓民無得而稱焉

三讓何也泰伯之德足以朝諸侯有天下

當商周之際商道寢衰周德日新人心之向

背天命之去留已可槩見泰伯又太王之

長子其統緒又在我是三者皆足以有天

下乃棄不取逃之荊蠻示不反也斷文自廢

示不用也。而人莫知其為何。其心隱其跡。泯然無得。而稱故曰。至德是謂三以天下讓也。太伯。荊蠻之逃。疑在太王既沒之後。蓋有以見夫周之必興。商之必亡而已。適當其難采。藥荊蠻。蓋有所託而而逃焉者也。夫利莫大於得天下。害莫甚於忘其家。棄莫大之利。而不取。而以身當忘家之害。而不辭。惟欲求乎此心之安。以不失乎天理之常。微太文則萬世君臣之防裂矣。即如集註所引史記諸說。

則周室畜不臣之心已四世非古今一大究
事耶其曰肇基王迹曰其勤王家蓋追原其
積功累仁而餘慶之來遠矣以見興王之道
非一朝一夕之故而乃據以為剪商之志始
於太王而以泰伯荆蠻之逃若欲潔已以遂
太王傳季歷以及昌之私則於君臣父子之
間不順莫大而可稱為至德耶夫子以至德
稱泰伯稱文王而謂武王未盡善其旨微矣
文王三分天下有其二據人心向背之分數

言耳乃曰荆梁雍豫徐揚歸周惟青兗冀屬
紂豈有紂為天子坐視民之叛已文王亦坐
受民之歸已而率叛以事紂俱於理勢為太
逆以服事殷蓋誠服而事之畧無一毫忿怨
的念渾是未發氣象故曰文王之所以為文
也

至是則泰伯文王心事始暴白於天下
後世先儒謂深有補於名教此類是也

困辯錄卷之四終